




BIBL. NAZ.
VIII Emanuele III

SUPPL.
PALATINA

C

163

NAPOLI



978

[illegible]

626.738

EPISTOLA PASTORALIS

AD CLERUM, ET POPULUM
UXENTI DIOECESIS



ROMÆ 1828
EX TYPOGRAPHIA BERNARDINI OLIVIERI

Superiorum facultate.

F. ANGELICUS DE MESTRIA

ORDINIS MINORUM S. FRANCISCI CAPUCCINORUM

SACRAE THEOLOGIAE LECTOR

TERTIO AC ITERUM

IN VENERABILI LUCANÆ PROVINCIA

MINISTER PROVINCIALIS

DEI MISERATIONE, ET APOSTOLICAE SEDIS GRATIA

UXENTI EPISCOPUS

*Venerabilibus Fratribus, et amantissimis in Christo Filiis
Dignitatibus, Canonicis, Parochis, Clero
Populoque suae Dioecesis
salutem.*

Non hominum simplicium fortuna, non foeminarum imbecillium sors, non stultorum fatalistarum fatum, non impij Epicuri atomi increati, neque maligni Helvetii casualis illorum conjunctio mundum gubernent: sed solummodo Deus Optimus Maximus est ille, qui cum sua Sapientia infinita, ac Providentia simul Universum Orbem, quem condidit, movet, regit, atque moderat: portans omnia verbo oris sui: omnia fortiter, suaviterque disponit, & in sua dispositione non fallitur. In Deo etiam sunt hominum voluntates, & illorum sortes in manibus illius: & nullus est qui suae Divinae voluntati resistere possit. Si non esset haec catholica veritas usque a teneris unguiculis in corde nostro sculpta; nunquam credidissemus, quod post tot, tantosque labores per multos, & varios gradus in venerabili Lucaniae Provincia perfunctos; dum certi, & securi eramus aliquid quietis in Religione habere inopinate, & absque nullis nostris meritis videamus elevatos Nos esse ad sublimem Episcopatus dignitatem. Sincere fateamur, Dilectissimi, quod in primis hoc cogitantibus, turbatum est cor nostrum, & oculis nostris jugiter lacrymae fuerunt: at vero cogitantes postea, quod Deus sic voluit, sic permisit, cum Regio Psalte confidenter diximus: in te Domine speravi, non confundar in aeternum: Deus meus es

tu : in manibus tuis sortes meae. Cognita igitur hac veritate, quae ipsa luce clarius est, vram Dei esse voluntatem humiliter fronte, cordeque simul, conjunctis manibus, & in Caelum oculis elevatis, venerantes cernui judicia Dei, ejusque Decreta, non possumus cum Gentium Doctore, non esclamare, & dicere : O altitudo divitiarum Sapientiae, & Scientiae Dei, quam incomprehensibilia sunt judicia ejus, & investigabiles viae ejus ! & cum Propheta ; Judicia Dei, abyssus multa. Post ipsiusmet veritatis agnitionem, cum Episcopo Turonensi Divo Martino humilitate, filiali fiducia, & fide dicimus : Domine, si Populo tuo Uxenti, totiusque illius Dioecesis sumus necessarii, non recusamus laborem, fiat voluntas tua.

Insuper, certissime scientes, (juxta Divi Bernardini Senensis doctrinam) quod omnium singularum gratiarum alicui rationabili creaturae communicatarum, generalis Divinae Providentiae regula est ; quod quandocumque divina gratia aliquem eligit ad quemdam sublimem statum, omnia charismata donet, quae illi personae sic electae, ejusque officio necessaria sunt, atque illam copiose decorant. Quod maxime verificatum est in multis & veteris, & novae legis magnis viris. In veteri elegit, inter alios, duos Prophetas Isaiam, videlicet, & Jeremiam. Primum, ut mundo adventum suum annuntiaret : secundum, ut Populi Hebraei peccata reprehenderet. Ad Isaiam, qui alta, & profunda mysteria nuntiare debebat, calculo ignito labia ejus mundavit, quem Seraphim forcipe tulerat de Altari. Ad Jeremiam, qui strenue cum robore, & magna vi scelera illius populi duri objurgare debebat, ex utero matris suae sanctificavit illum, ut nemo ei aliquem defectum objicere potuisset. Maxime etiam verificatum est in lege nova, & praesertim in illis tribus Sanctis Praelatis, & in aliis permultis, de quibus ob brevitatis gratiam non loquimur, Petro Chrysologo, scilicet, Ravennae Archipraesuli, Nicolao Mirae Antistite, & Ambrosio Mediolanensi Archiepiscopo, qui doctrina, sanctitate, & prodigiis in Dei Ecclesia, tanquam clarissimae stellae, fulserunt.

Nos itaque his veris, ac solidis fundamentis innixi, in Domino confidimus, qui cum sit in verbis infallibilis, & in promissionibus fidelis benigne, & misericorditer daturus sit Nobis suum adjutorium, & gratiam ; ut fungere possimus officio nostro ad solam suam gloriam, & animarum salutem.

Divinae igitur gratiae ope muniti, ac roborati exercere Nos debemus Episcoporum ministerium, sicuti Apostolorum Sequaces, & Successores, qui viventes in carne virtutibus,

exemplis , & zelo , toto vitae cursu , morte simul , & sanguine Ecclesias sibi a Spiritu S. commissas plantaverunt , & illustrarunt ; sic Nos , instar illorum , quos posuit Dominus Episcopos regere Ecclesiam Dei , quam acquisivit sanguine suo , dare debemus pro Ecclesia , & Dioecesi nostra a Domino commissa vitam , sanguinem , & nosmetipsos. Ad exemplum quoque Domini N. J. C. , qui animam suam pro ovibus suis posuit : atque in mundo venit quaerere quod perierat , erigere quod abjectum erat , sanare quod aegrotum , alligare quod confractum , & quod infirmum consolidare : ita & Nos stricta obligatione tenemur oves pascere Verbi Dei pabulo , animam dare pro illis , exemplum bonorum operum praeberere , nullum periculum timere , & indesinenter laborare pro illarum salute. Suppliciter igitur , Dilectissimi , deprecamur Patrem D. N. J. C. , ut animas vestras sanctificet , ut omnes salvemini , ut vitam habeatis , & abundantius habeatis , crescentes de die in diem in agnitionem mysteriorum ejus : & non permittat , ut aliquis vestri pereat , neque filius sit perditionis , victima Daemonis , & inferni.

Quapropter rogamus Vos , Fratres , & Filii in Domino charissimi , atque instanter poscimus , ut quemadmodum non recusavimus animam nostram ponere pro vobis , & vestra salute ; ita & vos cum animi mansuetudine , ac corde simplici suscipiatis Verbum , Vocem scilicet Dei , quae potens est animas vestras salvas facere. Hilari , promptoque animo recipere illam debetis , non ut vocem nostram , ut videtur , quamvis miserrimi hominis , & peccatoris ; sed ut vocem Domini , Verbum Patris , lucem veram , quae illuminat omnem hominem venientem in hunc mundum : vultque omnes salvos fieri , & ad veritatis agnitionem venire.

At vero experientia compertum est , omnibusque clarum non posse in corpore solum caput aliquid gerere sine aliorum membrorum subsidio. Sic igitur Ecclesia cum sit Corpus morale , ut ait Apostolus , unum Corpus esse in Christo , singuli autem alter alterius membra ; precamur itaque Vos , Venerabiles Fratres , quorum adjutorio opus est Nobis , vos qui vocati estis in sortem Domini , ut vestram charitatem impendatis ad Dominicum gregem una cum Nobis pascendum . Idcirco admonemus vos , ut sobrie , pie , & juste vivatis , ut ministerium vestrum adimpleatis , noctuque , diuque orationibus instate , ut Divinas laudes clare , distincte , devote , ac voce concordi persolvatis. Speramus , quod omnes digne am-

buletis vocatione , qua vocati estis , & quod Nobiscum laboretis , ut vinea Domini Sabaot uberes fructus faciat tempore suo. Non desistatis verbo , exemplo , & conversatione Fideles populos instruere in doctrina sana ; ut non blasphemetur Verbum Domini , & non vituperetur ministerium nostrum. Attendite vobis , & universo gregi , in quo vos posuit Spiritus Sanctus ministros , & coadjutores nostros regere Ecclesiam Dei. Operam date , immo satagite , ut per opera bona certam vocationem , & electionem omnium vestrorum faciatis. Cave- te a fermento Pharisaeorum , quod est hypocrisis : cavete a doctrinis variis , & peregrinis , quae in errores vos inducant : curate , ut in Fidelibus vestrae curae commissis unus sit Do- minus , una Fides , unum Baptisma , sicuti unum Corpus su- mus in Christo Jesu. Et si aliquis praeoccupatus fuerit aliquo delicto , vel errore , vos qui spirituales estis , vos qui Sacer- dotes estis , ministri , dispensatores mysteriorum Dei , custo- des , & depositarii thesaurorum ejus , vos hujusmodi instrui- te in spiritu lenitatis , arguite , obsecrate , increpate in om- ni doctrina , & patientia. State in fide , in habitu sancto , in incessu graves , non criminatores , non multo vino servien- tes , bene docentes , ut omnes invicem diligant , ut Subditi sint Potestatibus , legibus obtemperent non tantum propter timorem , sed etiam pro conscientia ; ita ut in omnibus hono- rificetur Deus per Jesum Christum Dominum Nostrum.

Rogamus insuper peculiari modo Vos omnes , quibus cu- ra Animarum imposita est , ut non cessetis die , ac nocte unumquemque Fidelium vobis commissorum monere. Praedi- cate Verbum , instate opportune , importune , obsecrate Do- minum , & Patrem D. N. J. C. , ut corda eorum adaperiat in lege sancta. Viriliter agite , & confortamini : non desistami- ni frangere panem esurientibus ; frangere , nempe , Fidelibus Verbum Dei juxta uniuscujusque captum , & intelligentiam. Exponite illis ad cujus imaginem conditi sint , cujus membra sint , & quo praetioso sanguine redempti. Commendate & in excelso praeconio , & in Sacramenti Poenitentiae administra- tione maxima , & praecipua praecepta , Dei videlicet amo- rem , & proximi , ex quibus universa lex pendet , & Pro- phetae : commendate possidere animas eorum in patientia , in humilitate , & in Dei voluntate perficienda , in qua omnis christiana perfectio sita est. Explanate illis praecipua Sacro- sanctae Religionis nostrae mysteria , ut cognoscant quo amo- re dignus sit Deus , qua reverentia , & timore colendus , qua gratitudine tenemur in gratiis agendis pro tot , tantisque be-

neficiis nobis elargitis , maxime in redimendo nos a tenebrarum potestate , a peccato , & morte aeterna. Explanate denique omnibus , & multoties praedicate , finem , ad quem Deus creavit eos : allicite illos ad aeternae beatitudinis desiderium ad virtutes sectandas , pie vivendos in Christo Jesu , & peccata fugienda , tamquam a facie colubri : neque omittatis parvulos erudire in christiana doctrina tempore opportuno ; ut non dicatur vobis , quod Dominus per Prophetam lamentatur : Parvuli petierunt panem , & non erat , qui frangeret eis : neque patiamini , ut aliquis de populo ignoret sui status obligationes. Dum ergo tempus habetis , operemini bonum , maxime ad domesticos fidei , ut inter dispensatores fideles vos omnes inveniamini a Christo Domino , & plenam mercedem ab ipso recipiatis , qui dives est in misericordia , & dat unicuique secundum opera sua.

Regulares omnes rogamus etiam in Dioecesi nostra degentes , ut sicut adjutores nostri nominamini , & sitis , ita aliquid levaminis Nobis inferatis in Animarum regimine cum labore vestro , conversatione , zelo , & regulari observantia. Mementote , Fratres charissimi , Praepositorum vestrorum , Fundatorum scilicet Ordinum , qualia certamina habuerunt cum praecipuis hostibus nostris Mundo , nempe , Daemone , & Carne , & victores effecti sunt. Imitamini eos , quos Patres vocatis , & eorum Filii vos esse gloriamini. Non recedat a corde vestro , quae Domino spondistis : & si magna vobis videntur , quae promisistis , recordamini , quod majora sunt , quae Deus repromisit vobis. Non igitur vobis deterreat certamen laboris. Observate Regulam , observate Constitutiones vestras , & alia quae vestri sunt status . Emulamini charismata meliora : sanctificate animas vestras ; sanctificate populos Dioecesis nostrae sive in Confessionibus excipiendis , sive in Verbo Dei praedicando , sive in Ecclesiasticis functionibus exercendis , sive etiam in pietatis officiis , & negotiis aliis agendis . Vos , qui de mundo existis , tamquam a tempestoso mari , & ad salvationis portum confugistis , agite vitam sanctam , justam , abstinenter , & mortificatam ; ut omnes de populo videntes opera vestra bona glorificent Patrem vestrum , qui in Coelis est ; & cum fiducia Domino dicere possitis : ecce nos reliquimus omnia , & sequuti sumus Te.

Sed & Vos Sanctimoniales nostrae Dioecesis decus , & ornamentum precamur in Domino , ut digne ambuletis in vocatione , qua vocatae estis. Studete in omnibus placere Altissimo , & Jesu Christo Sponso vestro , qui se delectat inter li-

lia virginitatis, & candoris pascere. Instate orationibus, & obsecrationibus, hymnos, & psalmos canentes Domino in corde puro, & ab omni terrenarum rerum cura alieno. Diligite solitudinem, fugite Saecularium conversationes, quae vobis animum turbant, mentem distrahunt a rerum coelestium contemplatione. Charitas Domini de die in diem augetur in cordibus vestris. Nolite, quaesumus, Virginibus fatuis assimilari, quae tempore opportuno oleum in vasis suis accipere noluerunt; ut in extremo die non dicatur vobis, sicut illis: Nescio vos; sed potius sollicitae estote de vestra salute: induimini arma lucis: diligite Deum super omnia, Sorores vestras quoque propter Deum: observate regulas, aliaeque Religionis vestrae statuta; ut cum Coelesti Sponso ad aeternas nuptias intrare possitis.

Obsecramus pariter vos omnes, qui in populo primatum obtinuistis, & prae caeteris a Domino magis dilecti sive in bonis, quae fortunae vocantur, sive in naturalibus facultatibus, sive etiam in honore, & fama. Vos, qui a Domino constituti estis nobiles, & grandes, super plebem elevati, consulite vobis, & prospicite Patriae. Gressus vestros dirigite in Domini legis observantia; scientes, quod oculi omnium vobis respiciunt, & virtutes, vel vitia, quae absint, facillime imitantur ab eis. Mementote etiam, quod honorum, quae Vobis Deus abundanter elargitus est, depositarii sitis; & quanto majora a Deo accepistis dona, tanto majorem, ac strictiorem reddere debetis rationem. Idcirco ne despiciatis pauperes; immo subvenite illis, operite nudos, viduas defendite, & pupillos, oppressos quoque sublevate, ut extrema iudicii die a Christo Domino audire mereamini: venite benedicti Patris mei, possidete paratum vobis regnum a constitutione mundi.

Vos denique omnes, Filii charissimi, rogamus in Domino, ut quemadmodum accepistis, & audistis ab Ecclesiae vestrae Pastoribus, & Antecessoribus nostris, ita ambuletis. Abjcite opera tenebrarum, quae sunt peccata, & induimini arma lucis: induimini Dominum N. J. C., qui est benedictus in saecula, & Spiritum suum bonum dat omnibus petentibus se. Non enim vocavit vos Deus in immunditiam; sed elegit vos ante mundi originem, ut essetis sancti, & immaculati, digne Deo ambulantes, & per omnia placentes. Nolite omni Spiritui credere; sed illum probate si vere Spiritum Dei habeat: non enim desint homines seipsos amantes, qui verbis, actibusque blasphemantes, quae sancta, & vera sunt, ja-

ctant se alios illuminare, cum ipsi caeci sint. Nemo igitur vos seducat inanibus verbis, seu per fallacem saeculi Philosophiam, quae semper perniciose comperta est, atque a Deo, ejusque Ecclesia reprobata. State fortes in fide, in spe firmi, & in charitate servidi. Obedite Praepositis vestris, etiam disculis: observate mandata, assistite Sacris, devote Sacramenta frequentate, pacem quoque sectamini, & omnia vestra in charitate fiant; invicem diligentes, Fratres enim estis in Christo Jesu. Domini, diligite domesticos vestros tamquam filios. Servi obedite Dominis vestris carnalibus propter Deum: estote illis fideles, & reverentia, qua decet, illos honoramini. Viri, diligite uxores vestras, sicut Christus Ecclesiam: Uxores similiter subditae viris estote. Parentes, educate filios vestros in disciplina, & correptione Domini: quia qui diligit filium suum, assiduat illi flagella; & qui parcat virgae, odit filium suum. Operam date, ut ab infantia Deum time-re, & diligere valeant, atque ab omni peccato abstinere. Filii, obedite parentibus vestris: hoc enim justum est in Domino: & nolite abjicere disciplinam eorum; ut bene sit vobis, & sitis longaevi super terram. Desiderio desideramus, dilectissimi, quam citius venire ad vos, ut de donis a Deo acceptis vobis elargiamur pro spirituali vestra salute.

De caetero, orate omnes pro Sanctae Ecclesiae conservatione, & exaltatione, pro salute Summi Romani Pontificis LEONIS XII feliciter regnantis, Patris, ac Pastoris omnium Christifidelium, ejusque in terris Vicarii; ut Deus illum conservet per multos annos, detque illi verbo, & exemplo, quibus praeest proficere; ut Ecclesia Dei sub tanto Duce, ac Magistro moderata pace, ac tranquillitate quiescat; & Filii ejus de die in diem augeantur.

Sed & pro piissimo Rege nostro FRANCISCO I petitiones vestrae apud Deum innotescant, ac cordis effusione preces fundite; ut Deus, & Dominus noster, una cum MARIA ELISABETH Regina nostra, totiusque Regiae Familiae, ab omni adversitate servet semper incolumem; detque illi longitudo dierum, pacem, & prosperitatem, vim, & constantiam tuendi Regnum ab omni hostili incursione, & Subditos in tranquillitate regendi.

Orate denique pro Nobis, ut Dominus N. J. C. suam gratiam, & misericordiam concedere dignetur, ad perficiendum opus, ad quod sua miseratione vocare Nos voluit pro ipsius gloria, & animarumstrarum salute. Dominus pacis det vobis pacem sempiternam in omni loco. Dominus N. J. C. sit cum

(10)

omnibus vobis, cujus nomine, Pastoralem benedictionem,
in amoris nostri pignus, omni cordis intima effusione,
& affectu amantissime impertimur.

Datum Romae die 5. Februarii 1828.

NIHIL OBSTAT

F. Antonius Franciscus Orioli Ord. Min. Conv. Censor Theol.

I M P R I M A T U R

Fr. Joseph Maria Velzi S. P. A. Mag.

I M P R I M A T U R

Joseph della Porta Patr. Constantinop. Vicesg.

626738



